

"REGULAMENTO DO REXISTRO MUNICIPAL DE UNIÓNS E FEITO DO CONCELLO DE BARALLA.

Exposición de motivos:

Na sociedade actual, moitas persoas constitúen unidades de relación afectiva de carácter estable sen chegar a formalizalas nun contrato matrimonial, unións que dan lugar a verdadeiros núcleos familiares non suxeitos actualmente a ningunha regulación xurídica mais alá da interpretación que os xuíces e tribunais formulen naqueles casos nos que o desamparo do dereito produce a xudicialización dos conflitos. Xurdiu así nos últimos anos unha inqueda social respecto a que as parellas de feito vexan garantido o seu dereito á non discriminación social en base ó que establece o artigo 14 da Constitución.

De acordo co disposto nos artigos 1.1º, 9.2º, 10.1º e 14 da Constitución, o libre desenvolvemento da personalidade e a igualdade ante a Lei que, constitúen principios fundamentais do noso ordenamento xurídico e social, e demandan de todos os poderes públicos a promoción das condicións para que esta liberdade e igualdade dos cidadáns e dos grupos en que se integran sexan reais e efectivas, debendo eliminarse os obstáculos que impidan ou dificulten a súa plenitude.

A esixencia constitucional da igualdade e liberdade está dirixida a todos os poderes públicos e por isto, mentres non se promulguen as disposicións legais pertinentes, e sen prexuízo da aplicación analóxica ou dunha interpretación xudicial adecuada á realidade social dos nosos tempos (art. 3 e 1 do Código Civil), parece procedente ofrecer, incluso no reducido ámbito da administración municipal, un instrumento xurídico que favoreza a igualdade e garanta a protección social, económica e xurídica das familias constituídas mediante unións non matrimoniais con independencia da súa orientación sexual.

Por todo isto, coa finalidade de que poida quedar constancia no ámbito da administración municipal, tanto a efectos de inscrición no padrón municipal de habitantes como do resto de asuntos e servizos a cargo deste Concello, sen prexuízo doutras finalidades que poidan considerarse lexítimas e sen que en ningún caso isto poida representar alteración ou intromisión nas competencias que poidan corresponder a outros organismos, como é o recoñecemento doutras formas de proba de existencia da parella como actas notariais de convivencia, apróbase o regulamento seguinte:

Artigo 1º.

Créase no Concello de Baralla un Rexistro Municipal de Parellas de Feito, de carácter administrativo, onde se poidan inscribir, de xeito totalmente voluntario, as parellas que convivan sen estaren casadas, con independencia da súa orientación sexual.

Artigo 2º.

Inscribiranse as declaracións de unións non matrimoniais entre parella, con independencia da orientación sexual, solicitadas en instancia subscrita polos dous membros da unión e trala declaración formal respecto da existencia da unión realizada en comparecencia persoal e conxunta perante a Secretaría Xeral do Concello.

A solicitude e declaración formalizaranse en modelos normalizados que figuran como anexo ao presente Regulamento.

Artigo 3º.

3.1. Establécense como requisitos mínimos para a inscrición no Rexistro:

Ser maiores de idade ou menores emancipados, acreditándose coa fotocopia do documento nacional de identidade ou documentos acreditativos da emancipación, de conformidade co establecido no artigo 314 e seguintes do Código Civil.

Non ter sido declarados incapacitados ou estar incurso nas prohibicións recollidas nos artigos 46 e 47 do Código Civil, achegando declaración responsable para tal efecto.

Estar empadroado no Concello de Baralla, que se acreditará mediante certificado de empadramento que se incorporará de oficio unha vez presentada a solicitude de inscrición e comprobado este dato polo responsable do padrón municipal.

Non estar ligado por vínculo matrimonial ou inscrito como membro doutra unión de feito non cancelada. Acreditarase mediante certificado de fe de vida e estado civil das persoas interesadas e declaración de cada un dos membros da parella de non figurar como membros doutras unións de feito non canceladas.

Non ter parentesco en liña recta por consanguinidade ou adopción, nin ter parentesco en liña colateral por consanguinidade ou adopción ata o segundo grao.

Acreditándose mediante declaración responsable.

3.2. Á solicitude de inscrición acompañarase a documentación acreditativa do cumprimento dos requisitos sinalados no apartado 3.1.

Artigo 4º.

Serán obxecto de inscrición:

a) A declaración de constitución das unións de feito (realizada segundo anexo a este Regulamento), e de extinción das mesmas cando concorra algunha das causas do artigo 6.

b) Os contratos civís reguladores das relacións persoais e patrimoniais entre os membros da parella que serán transcritos literalmente. Así como outros feitos e circunstancias relevantes que afecten á unión de feito.

Artigo 5º.

Calquera modificación posterior dos datos inscritos en canto ao convenio e feitos ou circunstancias, deberase efectuar mediante comparecencia persoal e conxunta dos membros da unión de convivencia non matrimonial.

Artigo 6º.

A extinción da unión civil poderá ser polos motivos seguintes:

- Mutuo acordo.
- Vontade unilateral dun dos membros da parella, previa audiencia do outro.
- Morte ou declaración de falecemento dun dos seus membros.
- Matrimonio dalgún dos membros.

Tamén procederá a baixa cando, por traslado do domicilio habitual, ningún dos membros da unión de feito se encontre empadroado no Concello de Baralla. Os membros da unión de feito están obrigados a solicitar a cancelación da inscrición no Rexistro Municipal de Parellas de Feito deste Concello cando concorran calquera das causas que dan lugar á extinción da unión.

Artigo 7º.

O Rexistro materializarase nun libro xeral, no que se practicarán as inscricións das unións de parellas de feito do Concello de Baralla. Este libro estará formado por follas móbiles, foliadas e seladas e encabazarase e rematará coas correspondentes dilixencias de apertura e peche.

Artigo 8º.

A primeira inscrición de cada parella terá o carácter de inscrición básica e á marxe da mesma anotarase o número das páxinas do libro xeral nas que existan anotacións que lles afecten.

Artigo 9º.

O rexistro de unión de parellas de feito do Concello de Baralla estará a cargo da Secretaría xeral do Concello e co fin de garantir a intimidade persoal e familiar dos inscritos no rexistro non se lle dará publicidade ningunha ao contido dos asentos, agás as certificacións que expida a Secretaría Xeral do Concello a instancia exclusivamente de calquera dos membros da unión de feito interesados ou dos xuíces e tribunais de xustiza.

Artigo 10º.

As inscricións serán gratuítas así como as modificacións, e renovacións ou baixas.

DISPOSICIÓN FINAL.

O Rexistro Municipal de Parellas de Feito do Concello de Baralla entrará en vigor trala publicación no Boletín Oficial da Provincia do seu texto íntegro e transcurso do prazo establecido no artigo 65.2 da L.R.X.P.A.C.

ANEXO

MODELO DE SOLICITUDE DE INSCRICIÓN NO REXISTRO DE UNIÓNS DE FEITO DO CONCELLO DE BARALLA

Don/Dona ..., con D.N.I n.º ..., e don/dona ..., con D.N.I. n.º ..., maiores de idade, empadroados no Concello de Baralla ..., con domicilio común en ... e teléfono ...

EXPOÑEN:

Que reúnen os requisitos esixidos no artigo 3" do Regulamento do Rexistro de Parellas de Feito do Concello de Baralla, aprobado por acordo plenario de data ..., e publicado no Boletín Oficial da Provincia de Lugo n.º ..., de data ..., acreditados coa documentación seguinte:

- Fotocopia cotexada do D.N.I.
- Documentación acreditativa da emancipación.

- Certificado do estado civil das persoas interesadas.

- Declaración responsable respecto de cumprir os requisitos esixidos no artigo 3 do devandito regulamento.

SOLICITAN, libre e voluntariamente

PRIMEIRO: A inscrición no devandito rexistro como parella de feito.

SEGUNDO: A constancia no rexistro dos convenios feitos e circunstancias que se especifiquen en folla que se achega a solicitude.

Baralla, ... de ... de 200...

Asdo. Asdo.

MODELO DE DECLARACIÓN RESPONSABLE

Don/Dona ..., con DNI n.º ... e don/dona ..., con DNI n.º ..., empadroados no Concello de Baralla, con domicilio en ...

Aos efectos establecidos no artigo 3" do Regulamento de Parellas de Feito do Concello de Baralla realizan a seguinte

DECLARACIÓN RESPONSABLE

Primeiro.- Que son maiores de idade.

Segundo.- Que non foron declarados incapacitados por sentenza xudicial firme.

Terceiro.- Que o seu estado civil actual é:

Don/Dona ...

Don/Dona ...

Cuarto.- Que actualmente forman unha unidade de convivencia non matrimonial estable, no domicilio citado na instancia.

Quinto.- Que coñecen o articulado do regulamento e que se comprometen a comparecer persoal e conxuntamente no suposto de modificación posterior dos datos inscritos en canto a convenios, feitos ou circunstancias manifestados na solicitude inicial.

Baralla, ... de ... de ...

Asdo. Asdo.

MODELO DE FOLLA DE INSCRICIÓN NO REXISTRO

(Selo da entidade) Sinatura do/a Secretario/a (Folio no ...).

Inscrición n.º ...

Data de solicitude de inscrición: ...

N.º de rexistro de entrada: ...

Enderezo: ...

Sendo as ... horas do día ... de ... de ..., comparecen perante min, D./D.^a ..., Secretario/a do Concello de Baralla, as persoas que a continuación se relacionan:

Don/dona ...

Don/dona ...

O obxecto da comparecencia e manifestar:

Primeiro.- Que son certos todos os datos consignados na solicitude formulada para a inscrición no Rexistro Municipal de Parellas de Feito, así como na declaración e demais documentación presentada coa mesma.

Segundo.- Que no día de hoxe forman unha unidade de convivencia estable no enderezo no que aparecen empadroados.

Terceiro.- Que solicitan quede constancia, mediante transcripción literal, dos seguintes convenios reguladores das relacións persoais e patrimoniais entre os membros da unión de feito ...

Cuarto.- Que solicitan quede constancia dos feitos seguintes e circunstancias relevantes que afectan á unión non matrimonial ...

Logo da lectura íntegra de todo o exposto, os comparecentes ratifícanse no manifestado e, en proba de conformidade, asinan ante min, Secretario/a, que dou fe, o presente documento en Baralla, a ... de ... de ...

OS INTERESADOS O/A SECRETARIO/A